

Kuussuup (Austmannadalen) eqqissimatitaanera pillugu Namminersornerullutik Oqartussat nalunaarutaat nr. 23, 14. juli 2008-imeersoq

Pinngortitamik illersuineq pillugu Inatsisartut inatsisaanni nr. 29-imi, 18. decembari 2003-imeersumi § 5, imm. 1, nr. 1, 4, 8-9, § 16, imm. 1, § 46, aamma § 60, imm. 2 aamma imm. 4, naapertorlugit aalajangersarneqarpoq:

Siunertaq sumiiffimillu killiliineq

§ 1. Kuussuaq (Austmannadalen) taassumalu nunap eqqaa Nuup Kommunianiittoq, sumiiffiup isikkuata aamma kulturikkut oqaluttuarisaanerata allanngutsaaliorneqarnissaa kiisalu nunap nungullariartunnginnissaata isumannaallisaavigineqarnissaa siunertaralugu, eqqissimatitassanngortinneqarpoq. Aammattaaq eqqissimatitsinermi nunap ilaani savat nujitsut nujuartatut uummasuusut illersorneqassapput.

Imm. 2. Aatsitassarsiornermut atatillugu misissueqqaarnernik, ujaasinernik piiaanermillu suliaqarnermi nalunaarut atuutinngilaq. Pinngortitamik illersuinissaq pillugu maleruagassat kiisalu sanaartornissaq ilaalu ilanngullugit, inatsisit sulianut taamaattunut piginnaatitsinermut imaluunniit akuersissuteqarnermut tunngaviusut naapertorlugit kiisalu taakkuninnga ataatsimoortumik oqartussaasutut suliarinninnermut ilaatillugit aalajangersaavigineqartassapput.

§ 2. Nuna eqqissimatitap nunap assingani ilanngussaq 1-imi takuneqarsinnaavoq.

Imm. 2. Sermip killinga atuallallugu sermip sinaata tungaanut eqqissimatitamut killeqarfiuvoq.

Kikkulluunniit appakkaasinnaanerat atuinerlu

§ 3. Nalunaarummi matumani killiliinerit eqqaassanngikkaanni kikkulluunniit sumiiffimmut eqqissimatitamut appakaassinnaapput.

§ 4. Nunap eqqissimatitap iluani tatsit, kuuit, kangerluit imaluunniit nunat, qanoq iliornikkulluunniit iliuuseqarluni eqqakkanik, aalisarnermi atortunik atornikunik, nalunaarsuutunik imaluunniit ilisimatusarnermi atortunik qimataqarnikkut mingutsinneqarnissaat inerteqqutaavoq.

Imm. 2. Nunap naasuunik innarliineq imaluunniit nunamik allanngortitsinerit inerteqqutaapput.

§ 5. Nunap eqqissimatitap iluani savanik nujitsunik nujuartatut uummasuusunik piniarneq inerteqqutaavoq.

§ 6. Nunap eqqissimatitap iluani nunalerinermik suliaqarnerit, uumasuuteqarneq, narsaasioorneq imaluunniit naatitassanik ikkussuineq inerteqqutaapput.

Tupertorneq silamilu ikumatitsineq

§ 7. Nunap eqqissisimatitap iluani tupertorneq, silami ikumatitsineq, matumani gassimik sprittimillu ikummatilinnik il.il. atuneq ilanngullugit, uninngaffigisami taamaallaat ullunik tallimanik sivisussulimmi pisinnaapput. Tamatuma kingorna tupertorneq aamma silami ikumatitsineq, matumani gassimik sprittimillu assigisaannilluunniit ikummatilinnik atuneq ilanngullugit, ingerlaannassappat, tamanna siullermik uninngaffigisatut atorneqartumit minnerpaamik 100 meterinik ungasissulimmi taamaallaat pisinnaavoq, taamaattoq takuuk imm. 2.

Imm. 2. Nunaminertat aalajangersimasut tupertornermut aamma silami ikumatitsinermit atatillugu, matumani gassimik sprittimillu ikummatilinnik assigisaannilluunniit atuneq ilanngullugit, ullut unnuallu tallimat sinnerlugit sivisussulimmik atorneqartussat, Attaveqarnermut Avatangiisinullu Naalackersuisoqarfimmut aamma Aatsitassanut Ikummatissanullu Pisortaqarfimmut tusarniaareernerup kingornatigut Nuummi kommunalbestyrelsimit toqqarneqassapput. Ullunit unnuanillu tallimanit sivisunerusumik sumi tupertortoqarsinnaanersoq aamma silami ikumatitsisoqarsinnaanersoq, matumani gassimik sprittimillu ikummatilinnik assigisaannilluunniit atuneq ilanngullugit, erseqqissumik nalunaaqutserneqassapput.

Imm. 3. Nunami eqqissisimatitami nunami naasut toqunerinik kipparlukunik kiisalu qissianik ikumatitassanik katersineq atuinerlu ajornartitaanngilaq.

Illuliorneq, sanaartorneq aamma pisuinnaat aqquataat

§ 8. Nunami eqqissisimatitami illuliorneq imaluunniit aalaakkaasunik allanik sanaartorneq kiisalu aqquuserniornerit aamma pisuinnartunut aqqustissiornerit inerteqqutaapput, taamaattoq takuuk imm. 2.

Imm. 2. Attaveqarnermut Avatangiisinullu Naalackersuisoqarfik Nuummi kommunalbestyrelsip aamma Aatsitassanut Ikummatissanullu Pisortaqarfiup tusarniarneqareernerisa kingornatigut, illuliornissamut allanillu aalaakkaasunik sananissamut akuersissuteqarsinnaavoq.

Imm. 3. Illuliat imaluunniit sanaartukkat aalaakkaasut allat annertussusissaat, suussusissaat, sumut inissinneqarnissaat, portussusissaat, ilusissaallu pillugit, kiisalu nunap naasullu ilusimisut iluseqaqqilersinnissaat pillugit Attaveqarnermut Avatangiisinullu Naalackersuisoqarfik atugassarititaasussanik akuersissutini imm. 2 naapertorlugu tunniunneqartuni aalajangersaasinnaavoq.

§ 9. Pisuinnaat aqquataat Attaveqarnermut Avatangiisinullu Naalackersuisoqarfimmut aamma Aatsitassanut Ikummatissanullu Pisortaqarfimmut tusarniaareernerup kingornatigut Nuummi kommunalbestyrelsip innersuussuteqarnera naapertorlugu nalunaaqutsersorneqarsinnaapput.

Nunami imaanilu angalaneq

§ 10. Nunami eqqissisimatitami sikkilinnik aamma qamutinik motorilinnik, matumani qamuteralaat (snescooter) ilanngullugit, angalaneq tamarmi inerteqqutaavoq, taamaattoq takuuk imm. 2.

Imm. 2. Ilisimatuussutsikkut misissuinerlut atatillugu qamuteralannik atuneq Attaveqarnermut Avatangiisinullu Naalackersuisoqarfiup akuersissutigisinnaavaa.

Imm. 3. Attaveqarnermut Avatangiisinullu Naalackersuisoqarfik atugassarititaasussanik akuersissutini imm. 2 naapertorlugu tunniunneqartuni aalajangersaasinnaavoq.

§ 11. Nunami eqqissisimatitami tatsini kuunnilu angallatinik motorilinnik angalaneq inerteqqutaavoq.

Imm. 2. Aalisarnermut, piniarnermut aallaaniarnermut kiisalu ilisimatuussutsikkut misissuinernut atatillugu motorilinnik imaani angalanerit imm. 1-imi pineqanngillat.

Timmisartunik angalanerit

§ 12. Nunami eqqissisimatitami sumiiffimmi pineqartumi uumasoaqarnera eqqarsaatigalugu 500 meterinit appasinnerusumi timmisartorneq kiisalu nunami eqqissisimatitami minnissaq inerteqqutaapput, taamaattoq imm. 2 – 5 takukkit.

Imm. 2. Aalajangersimasumik timmisartuussisarnerit akuersissuteqarfiusut, annaassiniarnerit ujaasisarnerillu kiisalu nunami eqqissisimatitami ilisimatuussutsikkut siunertalinnik timmisartornerit imm. 1-imi inerteqquteqarnermit pineqanngillat.

Imm. 3. Annaassiniarnerit ujaasinernullu atatillugu kiisalu nunami eqqissisimatitami ilisimatuussutsikkut siunertalimmik minnerit imm. 1-imi inerteqquteqarnermit pineqanngillat.

Imm. 4. Imm. 2-mi aamma 3-mi taaneqartunit allaanerusunik pisoqartillugu, nunami eqqissisimatitamik timmisartornissanut minnissanullu Nuummi Kommunalbestyrelsimik aamma Aatsitassanut Ikummatissanullu Pisortaqaarfimmik tusarniaareernerup kingornatigut, Attaveqarnermut Avatangiisinullu Naalackersuisoqarfik akuersissuteqarsinnaavoq.

Imm. 5. Nuummi Kommunalbestyrelsimik aamma Aatsitassanut Ikummatissanullu Pisortaqaarfimmik tusarniaareernerup kingornatigut Attaveqarnermut Avatangiisinullu Naalackersuisoqarfik atugassarititaasussanik akuersissutini imm. 4 naapertorlugu tunniunneqartuni aalajangersaasinnaavoq.

Aqutsineq, nakkutilliineq aamma immikkut akuersissuteqartarneq

§ 13. Nuummi Kommunalbestyrelsimik aamma Aatsitassanut Ikummatissanullu Pisortaqaarfimmik tusarniaareernerup kingornatigut nunamik eqqissisimatitamik aqutsinissamat pilersarusiamik Attaveqarnermut Avatangiisinullu Naalackersuisoqarfik suliaqassaaq.

§ 14. Nalunaarummi matumani aalajangersakkanik maleruaasoqarneranik Nuummi Kommunalbestyrelsi nakkutiginnissaaq.

§ 15. Nuummi kommunalbestyrelsimik aamma Aatsitassanut Ikummatissanullu Pisortaqaarfimmik tusarniaareernerup kingornatigut, § 7, imm. 1-imi, § 10, imm.1-imi kiisalu § 11, imm 1-imi aalangersakkanik uniuinissamik, Attaveqarnermut Avatangiisinullu Naalackersuisoqarfik immikkut akuersissuteqarsinnaavoq.

§ 16. §§ 4-6-mik, § 7, imm. 1-imi, § 8, stk. 1-imi, § 10, imm. 1-imi, § 11, imm. 1-imi kiisalu § 12, imm. 1-imi unioqutitsinerit akiliisitsissutaasinnaapput.

Imm. 2. § 8, imm. 2-mik aamma § 12, imm. 4-mik piumasaqaatinik aalajangersakkanik unioqutitsinerit akiliisitsissutaasinnaapput.

Imm. 3. Suliffeqarfik tamakkiisumik ilaannakuusumilluunniit naalagaaffimmit, Namminersornerullutik Oqartussanit, kommunimit imaluunniit kommuninit ataatsimoortunit

kommunalbestyrelsit nunaqarfinnilu aqutsisut il.il. pillugit Inatsisartut inatsisaanni pineqartunut ilaasunit, aktiaateqarluni piginneqatigiiffimmit, piginneqatigiiffimmit, piginneqatigiinnikkut ingerlatseqatigiiffimmit imaluunniit tamatumunnga assingusumit pigineqartoq unioqqutitsisuuppat, suliffeqarfik il.il. pineqartoq, pinerluttulerineq pillugu inatsit malillugu akisussaasunngortinneqarsinnaavoq. Tamannattaaq aamma atuuppoq Namminersornerullutik Oqartussat, kommuni imaluunniit kommunit ataatsimoortut, kommunalbestyrelsit nunaqarfinnilu aqutsisut il.il. pillugit inatsisartut inatsisaanni pineqartunut ilaasut unioqqutitsisuupata.

Imm. 4. Imm. 1- 3 malillugit akiliisitsissutaasut Nunatta karsianut ikineqassapput.

§ 17. Nalunaarut ulloq 1. august 2008 atuutilerpoq.

Imm. 2. Peqatigitillugu Nuup Kommuneani savat nujuitsut nujuartatut uumasuusut eqqissisimatinneqarnerannut ileqqoreqqusaq, 28. august 1989-imeersoq, atorunnaarsinneqarpoq.

Namminersornerullutik Oqartussat, ulloq 14. juli 2008

Kim Kielsen

/

Steffen Ulrich-Lynge

Ilanngussaq 1